

ანდრო ბარნოვი გიორგი მაზნიაშვილის სახლ-მუზეუმის თავდაცვის სამინისტროს პატრონაჟის ქვეშ აყვანის ინიციატივით გამოღის

22 მაისი 2013

გუბერნატორის პრეს-სამდივნოს ინფორმაციით, ამის შესახებ ბარნოვმა დღეს კასპის რაიონის სოფელ სასირეთში, გენერალ მაზნიაშვილის სახლ-მუზეუმში სტუმრობისას განაცხადა. "დღეს, საქართველოს ისტორიის ამ მძიმე დღეს, თავისუფლებისთვის მებრძოლი, დაუმარცხებელი გმირის, გიორგი მაზნიაშვილის სახლ-მუზეუმიდან მივმართავ თავდაცვის მინისტრს, სამინისტროს პატრონაჟის ქვეშ იქნას აყვანილი ჩვენი ეროვნული გმირის სახლ-მუზეუმი. სამინისტროში მუშაობისას ჩვენ გვქონდა ამისი სურვილი, მაგრამ სამწუხაროდ, განხორციელება ვერ მოვასწარი. დიდი გენერლის ცხოვრება და მოღვაწეობა არის მაგალითი, რის მიხედვითაც ჩვენი მომავალი თაობები უნდა აღიზარდოს. სკოლის მოსწავლეები, სტუდენტები, სამხედრო აკადემიის მსმენელები მუზეუმის ხშირი სტუმრები უნდა იყვნენ", - განაცხადა ბარნოვმა და იმედი გამოთქვა, რომ მის თხოვნას თავდაცვის სამინისტროს ახალი ხელმძღვანელობა გაითვალისწინებს. ცნობისთვის, უახლოეს დღეებში ბარნოვი სამხედრო აკადემიაში სტუმრობას და ამ თემაზე აკადემიის ხელმძღვანელობასთან საუბარს გეგმავს.